

मार्निंग डोगरी न्यूज़ बुलेटिन, समें. **09-20** Hrs

<><><><><><>

Headlines

- लोकसभा दे 5में गेड़ दे चुनां तैहत 5एं राज्यें ते 2 केन्द्र शासत प्रदेशें दिएं कुल 49 लोकसभा सीटें लेई अज्ज वोट पाए जा'रदे न।
- जम्मू कश्मीर दी बारामुला-कुपवाड़ा लोकसभा सीट ते लद्दाख दी इक्कली लोकसभा सीट लेई बी अज्ज गै 5में गेड़ दे चुनां तैहत वोट पाए जा'रदे न।
- चुनां आयोग नै जम्मू कश्मीर च आदर्श आचार संहिता दी खलाफवर्जी दे मामले च 40 सरकारी मलाजमें खलाफ कारवाई कीती ऐ।
- जम्मू च जबरदस्त गर्मी दा प्रकोप बरोबर जारी ऐ। सोए आले जोन च स्कूलें दे समें च बदलाव कीता गेआ ऐ।
- उपराज्यपाल मनोज सिन्हा होरें राई-बाई दे विकास बारे एपेक्स कमेटी दे सदस्यें कन्नै गल्लबात कीती।

<><><><><><>

Polling National

लोकसभा चुनाएं दे 5में गेड़ तैहत अज्ज 6एं राज्यें ते 2 केन्द्र शासत प्रदेशें दिएं 49एं पार्लिमानी हल्कें च इसलै वोट पाए जा'रदे न। इस गेड़ तैहत उत्तर प्रदेश दिएं 14, महाराष्ट्र दिएं 13, पच्छिम बंगाल दिएं 7, ओडिशा ते बिहार दिएं 5-5, झारखंड दिएं 3 ते जम्मू कश्मीर ते लद्दाख दी इक-इक पार्लिमानी सीटें लेई चुनां करोआए जा'रदे न। मतदान बडलै 7 बजे शुरू होआ हा ते एह संजा 6 बजे तोड़ी चलोग। चुनाएं दे इस गेड़ तैहत जेहदे प्रमुख मेदवारें दी किस्मती दा फैसला होना ऐ, उंदे च बीजेपी दे नेता ते केन्द्री मंत्री राजनाथ सिंह, पियूष गोयल, स्मृति ईरानी, केपैक्स लीडर राहुल गांधी ते के.एल.शर्मा। नैशनल कांफ्रेंस दे उमर अब्दुल्ला ते एलजेपी दे चिराग पासवान शामिल न। चुनाएं गी बेहतर ढंगै सिर करोआने लेई 94 जहार 732एं मतदान केन्द्रें पर 9 लक्ख 47 जहार मतदान अधिकारी तैनात कीते गेदे न।

अज्ज ओडिशा विधानसभा दे 35एं असैंबली हल्के लेई बी वोट पोआए जा'रदे न। इस गेड़ तैहत 8 करोड़ 95 लक्ख मतदाताएं चा 4 करोड़ 69 लक्ख मर्द मतदाता, 4 करोड़ 26 लक्ख महिला मतदाता ते 5 ज्हार 409 ट्रांसजेंडर मतदाता वोट पाने दे अपने अधिकार दा इस्तेमाल करगंन।

<><><><><><>

Polling Baramulla-Ladhak

जम्मू कश्मीर दी बारामुला-कुपवाड़ा लोकसभा सीट ते लद्दाख दी इक्कली लोकसभा सीट लेई अज्ज वोट पाए जा'रदे न। वोट पाने दा कम्म बडलै 7 बजे दा शुरू होई गेदा ऐ ते एह संजा 6 बजे तगर जारी रौहग। बारामुला हल्के दे किश इलाके च खरी मती गिनतरी च लोके गी मतदान केन्ट्रे दे बाहर अपनी बारी लेई बलगदे दिक्खेआ गोआ ऐ। इस हल्के थमां चुनां मैदान च खड़ोते दे 22 मेदवारें दे सियासी भविक्ख दा फैसला तकरीबन 17 लक्ख योग्य मतदाता अज्ज संजा तगर ईवीएम मशीनें च बंद करी देंगन। बारामुला हल्के दे 4 जिले बारामुला, कुपवाड़ा, बांडीपोरा ते बडगाम दे किश हिस्सें च कुल 2 ज्हार 103 मतदान केन्द्र खडेरे गेदे न। कश्मीर संभाग दे विस्थापत मतदाताएं लेई 26 खास मतदान केन्द्र खडेरे गेदे न। इंदे चा 21 मतदान केन्द्र जम्मू च, 4 दिल्ली ते इक उधमपुर जिले च बनाया गेदा ऐ। इस हल्के लेई जेहड़े मुख मेदवार चुनां मैदान च न, उंदे च नैशनल कांफ्रेंस दे उप-प्रधान उमर अब्दुल्ला, जम्मू कश्मीर पीपुलस कांफ्रेंस दे प्रधान सज्जाद गनी लोन ते तिहाड़ जेल च बंद साबका विधायक ते सांसद मेदवार इंजीनियर रशीद शामिल न। तोआई लद्दाख सीट लेई शड़ 5 मेदवार गै चुनां मैदान च न। इंदे च बीजेपी दे ताशी ग्यालमन, कांग्रेस दे सेरिंग नामग्या लते आजाद मेदवार मोहम्मद हनीफा जान शामिल न। 1967 तकर लद्दाख, गांदरबल संसदीय चुनां हल्के दा हिस्सा रेआ ते मगरा हदबंदी दे बाद 13में आम चुनाएं दरान इस इक्कली सीटे लेई मतदान करोआया गोआ हा। इसलै चला'रदे पार्लिमान्नी चुनां 14में आम चुनां न।

<><><><><><>

Govt. Employes MCC

जम्मू कश्मीर चुनां मैहकमे नै 40 सरकारी कर्मचारिएं खलाफ आदर्श आचार संहिता दी खलाफवर्जी करने लेई कारवाई कीती ऐ। सरकारी प्रवक्ता मूजब 4 कर्मचारी मुअत्तल कीते गे न, इक दे खलाफ कारवाई शुरू कीती गई ऐ, इक गी अपनी सेवा थमां हटाया गोआ ऐ ते 34एं खलाफ जांच शुरू कीती गई ऐ। एह कारवाई मुत्तलका जिला चुनां अधिकारिएं आस्सेआ बक्ख-बक्ख जिले च हासल ऑफलाइन शकैते दे आधार पर होआ'रदी ऐ। एह शकैतां मुख चुनां अफसर हुंदी ई-मेल आईडी पर हासल होइयां हियां जिनें गी आम लोके, सियासी पार्टिएं ते पंचैती राज इदारे आस्सेआ दर्ज करोआया गोआ।

इस गैह दा मकसद चला'रदे आम चुनाएं गी आजाद ते निपक्ख ढंगै सिर करोआना जकीनी बनाना ऐ। आदर्श आचार संहिता दी खलाफवर्जी दियां मतियां शकैतां श्रीनगर, कुलगाम, राजौरी, उधमपुर ते गांदरबल जिले थमां हासल होइयां न।

<><><><><><>

OGWS

पुंछ जिले च सार्वजनिक सुरक्षा अधिनियम दे तैहत आतंकवादिएं गी कथित तौर पर मदद पजाने दे मामले च त्रै लोकें गी हिरासत च लैता गेआ ऐ। आकाशवाणी जम्मू संवाददाता दी रिपोर्ट मूजब पुलस नै केन्द्र शासत प्रदेश दी सुरक्षा आस्तै खतरा पैदा करने आले 3 लोकें गी हिरासत च लैता गेआ ऐ। हिरासत चलैते गेदे लोकें पुंछ जिले दी मेंढर थाहर दे गुरसाई ग्रां दे रौहने आले न। पुंछ ते राजौरी जिले च पिछले 2 ब'रें च आतंकवादी हमले होए जेह्दे च केई सारे सुरक्षा कर्मी शहीद होए ते किश नागरिक बी मारे गे। पुंछ ते राजौरी जिला अनंतनाग संसदीय हल्के दा हिस्सा न जित्थें 25 मई गी 6में गेड़ तैहत मतदान होना ऐ।

<><><><><><>

Kargil-Nagrota

कारगिल विजय दिवस दे रजत जयंति समारोह गी दिक्खदे होई भारती फौज आस्सेआ डंसाल नगरोटा आले सरकारी सीनियर सकेंदरी स्कूल च कारगिल विजय दिवस बारे इक फिल्म दस्सने ते थेआरबंद बलें च करियर बारे इक लैक्चर दा सरिस्ता कीता गेआ। 11मीं ते 12मीं जमात दे 100 विद्यार्थिएं ते स्कूली अमले नै बी इस कार्यक्रम च हिस्सा लैता। इस गैह दा मकसद विद्यार्थिएं गी साढे जवानें दी दलेरी ते बलिदान बारे जानकार बनाना ते उंदे अंदर राश्ट्रीयता ते देशभक्ति दी भावना पैदा करना हा।

<><><><><><>

Traffic

जम्मू कश्मीर राश्ट्री जरनैली शिड़कै पर कल गड्डिएं दी आओजाई बंद रौहग। ट्रैफिक पुलसै सोशल मीडिया दी इक पोस्ट राएं दस्सेआ गेआ ऐ जे कल कुसै बी किस्मै दी गड्डी गी जम्मू थमां श्रीनगर जाने ते श्रीनगर थमां जम्मू आने दी खुल्ल नेई दित्ती जाग।

इस्सै चाल्ली जम्मू थमां रामबन, गूल, बनिहाल ते श्रीनगर जाने ते उत्थुआं इस बक्खी औने दी खुल्ल नेई होग। लोकें गी सलाह दितती गई ऐ जे ओह इस सूचना दे मताबक गै अपनी यात्रा दी योजना बनान।

<><><><><><>

Heat Wave

इसलै बड़ी मती गर्मी पवा'रदी ऐ। जम्मू च कल इस मौसम दा सब्बने थमां गर्म दिन रेआ। कल तापमान 41.5 डिग्री सैल्सियस दर्ज कीता गोआ। आकाशवाणी जम्मू संवाददाता दी रिपोर्ट मूजब मौसम विभाग नै 27 मई तगर इयै नेहा मौसम बने दे रौहने दी पेशगोई कीती ऐ। पिछले इक हफते थमां बड़ी मती गर्मी पवा'रदी ऐ ते 40 डिग्री थमां बद्ध तापमान पिछले किश दिनें थमां चला'रदा ऐ। मौसम विभाग नै उआं अगले 2 दिनें च जम्मू कश्मीर दी टामी टामी थाहरें पर बरखा पेई सकदी ऐ।

<><><><><><>

School Timing

बड़ी मती गर्मी गी दिक्खदे होई जम्मू दे स्कूल निदेशालय आस्सेआ जम्मू खित्ते दे सम्मर जोन आले स्कूलें दे समें च बदलाव कीता गोआ ऐ। आकाशवाणी जम्मू संवाददाता दी रिपोर्ट मूजब इसलै पवा'रदी बड़ी मती गर्मी दे चलदे सारे सरकारी ते निजी स्कूलें दा समां बडलै 8 बजे थमां दपैहरी 12 बजे तगर होग। एह आदेश अज्जै थमां लागू होई गोआ ऐ।

<><><><><><>

LG-Apex

उपराज्यपाल मनोज सिन्हा होरें राई-बाई ते एहदे कन्नै जुड़े दे सेक्टरें दे पूरे पराते विकास बारे सब्बने थमां बड्ड अपैक्स कमेटी दे मिंबरें कन्नै गल्लबात कीती। कमेटी अध्यक्ष डॉ. मंगला राय न, जेहड़े आईसीएआर दे साबका निदेशक बी हैन। उपराज्यपाल होरें मिंबरें कन्ने इलाके स्हाबै जरूरतें ते कारवाइएं बारे चर्चा कीती। कमेटी दे मिंबरें राई-बाई दे पूरे पराते विकास सरबंधी प्रोग्राम दी कारगर ढंगै सिर जम्मू कश्मीर च अमलावरी दी सराहना कीती। मिंबरें शोपियां थमां बागवान खुरम मीर कन्नै बी गल्लबात कीती। इस दरान उनें अपने जतनें ते इस क्षेत्र च निजी निवेश आनने बारे बी गल्ल कीती।

<><><><><><>

e-Bus Udhampur(byte)

जम्मू ते उधमपुर बश्कार ई-बस सेवा शुरू होने कन्नै एह सफर बड़ा अरामदेह बनी गेआ ऐ। उधमपुर जिले च पैहली बारी एह सेवा शुरू कीती गई ऐ। ई-बस सेवा लेई इक बक्खी दा कराया 120 रपे रखेआ गेआ ऐ ते तकरीबन डेढ़ घँटे च ई-बस अपना एह सफर पूरा करोग। उधमपुर ते जम्मू बश्कार शुरूआती तौर पर अजे 5 ई-बसां चलाइयां गेइयां न ते इनें बसें गी चार्ज करने लेई उधमपुर बस अड्डे पर इक चार्जिंग प्वाइंट बी बनाया गेआ ऐ। मती जानकारी साढ़े उधमपुर संवाददाता कोला.....

<><><><><><>

Army Solar Panel

भारती फौज आस्सेआ कार्य से कुशलता योजना तैहत अखनूर दे भरदा कलां ग्रां च साबका फौजिएं ते साबका सरपंचें लेई लैक्चर आले इक खास कार्यक्रम दा आयोजन कीता गेआ। इस दरान प्रधानमंत्री हुंदी सोलर पैनल श्रफटॉप सब्सिडी योजना पर मुख् करी ध्यान केन्द्रित कीता गेआ ते एहूदा मकसद मकामी साबका सरपंचें ते साबका फौजिएं गी टिकारु ऊर्जा समाधाने बारे जानकार बनाना हा। इस दरान उनेंगी इस योजना दे फायदे, योग्यता ते आवेदन प्रक्रिया बारे टकोहदी जानकारी दित्ती गई।

<><><><><><>

Bhaderwah Cleanliness

भद्रवाह जिले च सैलानी थाहरें दी साफ सफाई ते सांभ-सम्हाल जकीनी बनाने लेई डोडा दे जिला प्रशासन नै कल जाई वैल्ली ते दरु होरने थाहरें पर साफ सफाई आला इक अभियान चलाया। इस पैहलकदमी दा मकसद इनें लोकप्रिय सैलानी थाहरें पर साफ सफाई गी बढ़ावा देना ते उत्थें औने आले सैलानिएं दे तर्जुबें गी बेहतर बनाना ऐ। डोडा दे डिप्टी कमीशनर हरविंदर सिंह ते होरने ऐहलकारें बी बड़ी सक्रियता कन्ने इस अभियान च हिस्सा लैता।

<><><><><><>